



Sesida dals

Communitgà ils

Protocol nr.

28 d'avrigl 2015

1. da matg 2015

357

Incumbensa Kappeler

concernent la priorisaziun da la SATE Cuira

Resposta da la regenza

Per rinforzar l'attractivitat dal Grischun sco lieu da furmaziun e da perscrutaziun respectivamain per sustegnair las interpresas dal Grischun a recrutar personal spezialisà e per promover il transfer da savida e da tecnologia èsi necessari che la scola auta da tecnica ed economia SATE porschia ina scolaziun ch'è accordada cun ils basegns da l'economia grischuna e che cuntegna en spezial er studis tecnologicis. Perquai che passa 70 pertschient da las studentas e dals students da la SATE derivan oz d'ordaifer il Grischun, ha ina buna cuntanschibladad dal center da scola auta cun ils meds da transport publics ina gronda impurtanza. La SATE stat er en quest connex en ina concorrenza interchantunala per studentas e students d'auters chantuns. Uschia han per exempel la scola auta spezialisada da Son Gagl tar la staziun da Son Gagl, la scola auta da pedagogia da Turitg tar la staziun principala u la scola auta spezialisada da la Svizra dal nordvest en spezial als lieus Brugg-Windisch u Olten edifizis da scola ch'èn cuntanschibels excellentamain cun il traffic public.

In'activitad da scolaziun e da perscrutaziun ch'è accordada cun las interpresas localas e per part orientadas fermamain a l'export, presta ina contribuziun impurtanta a l'ulteriur svilup dal Grischun sco lieu economic. Studis d'auta qualitat che resguardan ils basegns da l'economia pon gidar a reducir la mancanza da personas spezialisadas ed a motivar interpresas existentas u novas da far investziuns en il chantun.

In center da scola auta ch'è renconuschì sur ils cunfins dal chantun ora sustegna l'entretschament da l'instrucziun, da la perscrutaziun e da l'economia. Uschia po in center da scola auta er prestar quella contribuziun impurtanta ch'è necessaria per il

Grischun sco lieu da rait per ademplir las pretensiuns dal concept "Parc d'innovaziun Svizra".

Gia cun tractar il rapport davart il svilup economic en il chantun Grischun (missiva da la regenza al cussegl grond, carnet nr.5/2014-2015, p. 305) è il cussegl grond s'exprimì en quella direcziun ch'i saja necessari d'elavurar pli svelt la dumonda dal lieu per la SATE (protocol da decisiuns dal cussegl grond 2014/2015, p. 283).

Las lavurs per realisar ina infrastruttura renovada per la SATE progredeschan. Actualmain sclerescha la SATE cun la confederaziun, quant auta che la contribuziun federala per in center da scola auta vegn ad esser.

En l'incumbensa qua avant maun vegni spetgà ch'il cussegl grond possia tractar en la legislatura currenta almain la missiva tar la construcziun d'in center da scola auta. Sche quai vegn ad esser pussaivel dependa da la dumonda, quant svelt che differentas dumondas ch'èn anc adina avertas (cuntegns futurs e direcziuns futuras dals studis, lieu, finanziaziun, ulteriura utilisaziun eventuala da l'infrastructura actuala e.u.v.) pon vegnir scleridas.

La regenza è conscianta da l'urgenza da prender ina decisiun concernent la direcziun ed il lieu d'in center da scola auta da la SATE Cuir. Ella è pronta da priorisar il project dal center da scola auta en il senn da la direcziun fixada dal cussegl grond (chapitel VII.6.2. missiva da la regenza al cussegl grond, carnet nr. 5/2014-2015, p. 305), renviescha però al fatg ch'ins stoppia far quint cun intschertezzas las pli differentas tar projects da construcziun. La regenza è pronta d'acceptar questa incumbensa.



En num da la regenza

Il president:

Martin Jäger

Il chancelier:

dr. C. Riesen